

上元縣志



地220.15

34

7

上元縣志

人物序

教養備選舉行而人物出矣邑開自吳聖門言游氏之里居在焉豈直俟龜山立雪程門而後吾道南也哉孫策雄峙江東張昭獨見委用諸葛亮兄弟往來吳蜀洎晉明帝東渡一時王導謝安名流輩出占籍金陵則邑之賢不必盡產自吳也明祖徙浙直人戶填實京師再傳靖難兵起方黃諸君子皎皎忠烈如日星河嶽之不可泯沒祠賢者因其人之賢而祠之祀之也世教克端則孝友姻睦之義起民生有四方

十

上元縣志

人物序

祠賢

邑獻

宦籍

治績

文學

忠烈

孝友



義行

隱逸

方技

列女  
附

上元縣志

人物序

二

上元縣志卷十五 先賢

先賢祠祀

周伍員字子胥爲吳行人吳以子胥之謀西破彊楚北威齊晉南服越人後數諫賜死

漢嚴光字子陵本姓莊避明帝諱改嚴少與光武同學及光武卽位光乃變姓名隱身不見光武以物色訪之齊國上言有一男子披羊裘釣澤中光武備安車元纁遣使聘之三反而後至車駕卽日幸其館光卧不起光武卽其卧所撫光腹曰咄咄子陵不可相助爲理耶光乃張目熟視曰昔唐堯著

上元縣志

卷十五

先賢

一

德巢父洗耳士各有志何至相迫乎復引光入論道舊故因共偃卧光以足加帝腹上明日太史奏客星犯帝座甚急光武笑曰朕故人嚴子陵共卧耳除爲諫議大夫不屈乃耕於富春山以壽終

諸葛亮字孔明少有卧龍之目耕南陽不求聞達及應昭烈聘以興復漢祚爲已任帝崩後主性懦躬自輔導任蔣允費禕等官府各得其職前後出師表先賢謂與伊訓說命相表裏卒年五十七諡武侯

吳周瑜字公瑾舒人英達夙成聞孫策聲聞自舒造

焉便推結分好及策行收兵至歷陽瑜自丹陽將兵迎之助以資糧曹操兵東下瑜與魯肅等迎戰於赤壁大破之操引還瑜渡江屯北岸與曹仁相拒歲餘仁委城走瑜屯據江陵蔣幹來說之瑜曰丈夫處世遇知己之主外託君臣之義內結骨肉之恩言聽計從禍福共之矣及病革謂魯肅忠烈臨事不苟舉以自代卒年三十六吳主聞之哀慟曰公瑾王佐之資今忽短命孤何賴哉初程普以年長數陵侮瑜瑜折節下之終不與校普後自敬服而親重之乃告人曰與周公瑾交若飲醇醪不

覺自醉

吳張昭字子布其先彭城人好學善隸書漢末避亂渡江居秦淮孫策命爲長史文武之事一以委之策亡昭率羣僚立策弟權而輔之權每田獵常乘馬射虎昭極諫魏使者邢貞拜權爲吳王入門不下車昭謂貞曰禮無不敬法無不行而君敢自尊大豈以江南寡弱無方寸之刃乎貞遽下車吳主於武昌臨釣臺飲酒大醉昭正色而出遂罷酒吳主旣稱尊號更拜昭輔吳將軍封婁侯食邑萬戶後公孫淵稱藩吳主欲遣使昭與相反覆涕泣橫

流不聽卒遣張彌詣宴往淵果殺彌宴吳主乃數  
慰謝昭昭固不起因出過其門呼昭辭疾篤吳主  
燒其門欲以恐之昭更閉戶吳主使人滅火駐門  
良久昭諸子共扶昭起乃載以還宮深自克責昭  
不得已然後朝會昭容貌矜嚴吳主憚之常曰孤  
與張公言不敢妄也年八十一卒遺令幅巾素棺  
歛以時服謚曰文

是儀字子羽北海營陵人避亂江東徙會稽吳主權  
優文徵儀專典機密歷官侍中黃武中遣之皖就  
將軍劉邵誘致曹休大破之入闕省尚書事又令

上元縣志

卷十五

先賢

三

教諸公子書輔太子登鎮武昌太子敬之事先諮  
詢然後行呂壹誣江夏太守刁嘉謗訕國政吳主  
怒將嘉繫獄驗問同坐人窮詰累日羣臣屏息儀  
據實云無聞辭不傾移嘉遂得免後拜尚書僕射  
以本職爲魯王傅盡忠規諫不治產業爲屋舍纔  
足自容拯贍貧困家無儲蓄吳主聞之幸其舍索  
視蔬飯親嘗之相對歎息卽增俸賜益田宅  
論曰先賢載吳越以來顧魯論以至德稱泰伯史  
遷以貨殖例陶朱姑置弗深考伍員致吳伐楚得  
不共戴天之義子陵釣澤中孔明耕南陽其隱處

同光武復漢舊物名臣濟濟可無子陵先主依倚  
表鄙非孔明不得成鼎足或去或不去時則然耳  
周公瑾破曹兵赤壁蔣幹說不得動張子布輔權  
諫出獵飲酒二事引君當道獨其言一不見聽卽  
作色辭疾至令其主駐門久而後出何也是儀不  
治生產蔬食自甘有古廉士之風焉

晉王祥字休徵琅琊臨沂人性至孝刺史檄爲別駕  
固辭不受弟覽勸之乃應召高貴鄉公卽位與定  
策功封關內侯晉武帝踐祚拜太保進爵爲公泰  
始五年薨葬江寧化成寺北

上元縣志

卷十五

先賢

四

周處字子隱義與人膂力絕人不修細行州里患之  
處慨然有改勵之志謂父老曰今時稔歲豐何苦  
不樂父老曰南山白額虎長橋下蛟並子爲三害  
未除何樂之有處乃入山殺虎沒水殺蛟勵志好  
學期年州府交辟仕吳爲東觀左丞築臺東隅爲  
退食讀書處吳平入洛累遷御史中丞凡所糾劾  
不避寵戚朝廷惡其強直使隸夏侯駿西征時賊  
衆七萬駿逼處以五千兵擊之遂力戰而沒

陶侃字士行其先鄱陽人後徙潯陽早孤貧爲縣吏  
鄱陽孝廉范逵嘗過侃其母截髮易酒肴以待逵

去追送百餘里逵曰卿欲仕郡乎侃曰困於無津耳逵過廬江太守張夔稱美之夔召爲樅陽令有能名舉孝廉至洛陽司空張華見而謂之曰後來匡主寧民君其人也除郎中後以軍功封侯暨蘇峻作逆京師不守溫嶠邀侃同赴朝廷進兵石頭平旋江陵拜侍中太尉加羽葆鼓吹改封公後平襄陽拜大將軍劍履上殿入朝不趨讚拜不名卒年七十六進大司馬謚曰桓尚書梅陶曰陶公機神明鑒似魏武忠順勤勞似孔明陸抗諸人弗及也謝安每言陶公雖用法而恒得法外意其爲世

上元縣志

卷十五

先賢

五

所重如此

溫嶠字太真太原祁人標俊清徹英穎顯名王敦請爲左司馬嶠謬爲勤敬敦任之會丹陽尹缺以嶠出守嶠至建康盡以敦謀告帝與庾亮畫計先爲之備及敦構逆加中壘將軍持節都督東安北部諸軍事敦平嶠之力也明帝疾篤與王導郗鑒庾亮陸曄卞壺同受顧命咸和三年蘇峻反邀陶侃討平之拜驃騎將軍開府儀同三司加散騎常侍始安公還鎮武昌道卒時年四十二謚忠武卞壺字望之濟陰人幼有名譽累轉御史中丞領尚



書令明帝不豫與王導等並受顧命成帝卽位導  
多所舉劾朝端震肅庾亮將召蘇峻壺固爭不從  
峻果稱兵壺率諸將拒戰時發背創猶未合力疾  
苦戰死之二子珍盱亦赴敵死夫人裴氏撫二子  
尸哭曰父爲忠臣爾爲孝子復何恨乎葬冶城旁  
謚忠貞

謝玄字幼度少穎悟爲叔父安所重及長有經國才  
略屢辟不起後與王珣俱被桓溫辟爲掾時符堅  
強盛邊境數被侵寇朝廷求文武良材可以鎮禦  
北方者安以玄應舉中書郎郗超聞而嘆曰安違

上元縣志

卷十五

先賢

六

衆舉親明也玄必不負舉才也時或以爲不然超  
曰吾嘗與玄在桓公府見其才雖履屐間亦得其  
任所以知之徵還拜建武將軍監江北諸軍事後  
攻符堅進號前將軍以勲封康樂縣公卒謚獻武  
王羲之字逸少司徒導從子高爽異常年十三謁周  
顓顓察而異之太尉郗鑒以女妻焉起家秘書郎  
後爲右將軍會稽內史謝安總中書嘗與羲之登  
冶城悠然遐想有高世之志羲之曰夏禹勤王手  
足胼胝文王旰食日不暇給今四郊多壘宜思自  
効而虛談廢務浮文妨要非當所宜安不能用羲

之人品甚高而爲書名所掩子獻之亦工書世稱二王爲古今之冠云

吳隱之字處默濮陽甄城人美姿容喜談論博涉文史以儒雅標名年十餘丁父憂每號泣行人爲之流涕事母孝謹及執喪哀毀過禮家貧無人鳴鼓每至哭臨之時恒有雙鶴警叫及祥練之久復有羣雁俱集時以爲孝感所致隆安初爲廣州刺史未至州二十里地名石門有水曰貪泉飲者懷無厭之欲隱之至泉所酌之且賦詩曰古人云此水一軟懷千金試使夷齊飲終當不易心及在州清

上元縣志

卷十五

先賢

七

擦愈厲罷官之日裝無餘資所居內外茆屋六間籬垣仄陋妻子不免飢寒初隱之爲奉朝請謝石請爲征南將軍主簿隱之將嫁女石知其貧素乃令移厨帳助其經營使者至見婢牽犬賣之此外蕭然無辦其清介如此

論曰王休徵仕高貴鄉公與定策封關內侯祚移但一流涕薄矣周子隱仕吳爲東觀左丞至今書臺遺址凜然有生氣陶士行機神朗徹意量甚深石頭之役溫嶠輔之同行功名並以此顯蘇峻稱兵望之力疾戰死二子亦殉謝幼度不負安石之

舉以勲封康樂公王逸少會稽內史人品高邁而  
爲書名所掩故自大雅不羣耳吳處默刺廣州酌  
貪泉賦詩泉固不能污人哉

宋雷次宗字仲倫豫章南昌人少入廬山事沙門釋  
慧遠篤志好學尤明三禮毛詩隱退不受徵辟宋  
元嘉十五年徵至京開館於雞籠山聚徒教授置  
生百餘人會稽朱膺之潁川庾蔚之並以儒學總  
監諸生時國子學未立上留意藝文使丹陽何尚  
之立元學太子率更令何承天立史學司徒叅軍  
謝玄立文學凡四學並建車駕數至次宗館資給

上元縣志

卷十五

先賢

八

甚厚久之還廬山公卿以下並設祖帳後又徵詣  
郡爲築室於鍾山西岩下謂之招隱館使爲皇太  
子諸王講喪服經次宗不入公門乃自華林東門  
入延賢堂就業

齊明僧紹字休烈平原鬲人明經有儒術舉秀才屢  
辟不就隱長廣郡嶗山聚徒立學魏克淮南乃渡  
江住攝山聞沙門釋僧遠風德往候於定林寺齊  
高帝欲入寺見之遁歸攝山帝以爲恨後仍賜竹  
根如意筍籜冠

梁阮孝緒字士宗陳雷尉氏人父彥之宋太尉從事

中郎幼至孝性沉靜十五冠而其父彥之誠之曰  
三加彌尊人倫之始宜思自劫以庇余躬答曰願  
跡松子於瀛海追許由於喬谷庶保促生以免塵  
累自是屏居一室未嘗出戶家人莫見其面外兄  
王宴貴顯屢至其門常避匿不與相見曾食醬美  
問之云是王家所得便吐餐覆醢義師圍京城家  
貧無以爨僅妾竊隣人樵以繼火孝緒知之乃不  
食更令撤屋而炊所居室惟有一鹿床竹樹環繞  
御史中丞任昉欲造而不敢望而歎曰其室則邇  
其人甚遠爲名流所欽尚比於鍾山聽講母王氏  
忽有疾兄弟欲召之母曰孝緒至性冥通必當自  
到果心驚而反大同二年卒謚曰文貞處士

陶弘景字通明秣陵人也幼有異操年十歲得葛洪  
神仙傳晝夜研尋便有養生之志謂人曰仰青雲  
觀白日不覺爲遠矣及長身長七尺四寸神機明  
秀朗目疎眉細形長耳讀書萬餘卷善琴棋工草  
隸未弱冠齊高帝作相引爲諸王侍讀除奉朝請  
永明十年上表辭祿詔許之及發公卿祖之於征  
虜亭供帳甚盛車馬填咽咸云宋齊以來未有斯  
事朝野榮之於是止於句容之句曲山曰此山下

是第八洞宮名金壇華陽之天周迴一百五十里  
乃中山立館自號華陽隱居大同二年卒年八十  
五顏色不變屈伸如恒謚曰貞白先生

論曰宋齊梁陳間強半皆功名中人耳士遭其會  
高自位置砥礪廉隅惟隱居教授一法予觀雷仲  
倫四君子代異而行實同杖履所在如邑之雞鳴  
埭鍾山西岩攝山梵寺其人雖遠其室則邇又嘗  
以公務過客城望華陽洞天白雲縹緲杳無定所  
蓋低徊留之不能去云

唐李靖字藥師性沉厚每與時宰參議恂恂似不能  
上元縣志 卷十五 先賢 十  
言奉命與趙郡王孝恭討輔公祏克丹陽斬公祏  
城中安堵秋毫無犯江南悉平拜特進以疾辭位  
太宗曰朕嘉公意欲以公爲一代楷模俟疾小瘳  
間三二日至門下中書平章政事封衛國公

顏真卿字清臣曲阜人肅宗時爲昇州刺史清嚴正  
直風采凜然人莫敢干之以私時劉展有異謀真  
卿慮侵軼江南乃選將訓卒緝戎器爲水陸備都  
統使李峘以爲生事密奏之詔徵爲刑部侍郎及  
展舉兵渡淮峘敗沒議者始多真卿而怨峘

李白字太白蜀郡人白之生母夢長庚星因以命之

十歲通詩書喜縱橫術擊劍爲任俠輕財重施天  
寶初至長安賀知章見其文歎曰子謫仙人也言  
於玄宗召見金鑾殿帝賜食親爲調羹有詔供奉  
翰林白猶與飲徒醉於市帝坐沉香亭意有所感  
欲得白爲樂章召入而白已醉左右以水頰面稍  
解援筆成文婉麗精切無留思帝欲官白輒被沮  
白知不爲親近所容懇求還山帝賜金放還白浮  
游四方嘗乘夜與崔宗之自采石至金陵著宮錦  
袍坐舟中旁若無人居金陵上秋浦多所題咏後  
卒於采石

上元縣志

卷十五

先賢

十一

孟郊字東野湖州人舉進士調溧陽縣尉庭前有  
大樹搦紙筆日吟哦其下於富貴利達泊如也爲詩  
有理與韓昌黎爲忘年交昌黎送行序云東野以  
詩鳴其高出晉魏不懈而及於古其他浸淫乎漢  
氏矣去尉二年爲轉運從事協律郎以母憂去又  
五年舉山南道節度叅謀卒張籍曰先生揭德振  
華於古有光賢者故事有易名可謚曰貞曜先生  
論曰李靖討輔公祏克丹陽城秋毫無犯顏清臣  
風采凜然劉展異謀不得發詩所爲賦价人也李  
白詩多言神仙事而意存規諷得屈騷懷君大致

孟東野泊於利達殆以窮工詩云

南唐李建勳字致堯先世爲國貴游然所與交皆寒  
賤士裘馬取具而已起家昇州巡官進中書侍郎  
加左僕射輔政比他相最久元宗尊遇之稱以史  
館而不名召拜司空乃營亭榭於鍾山累表稱疾  
致仕賜號鍾山公妻亦自號鍾山老媪卒贈太保  
諡曰靖

潘佑幽州人狷介高潔元宗授秘書正字直崇文館  
後主擢虞部員外郎史館修撰知制誥內史舍人  
以上疏忤旨自剄有榮陽集

上元縣志

卷十五

先賢

三

宋曹彬字國華真定靈壽人太祖受禪時諸將出師  
競爲屠戮彬獨申令戢下秋毫無犯所至民皆德  
之其受命伐南唐也圍其城三時居民困甚稱疾  
不視事諸將來問疾彬曰子疾非藥石所能愈惟  
須諸公誠心自誓以克城日不妄殺一人則余疾  
自愈諸將許諾共焚香爲誓明日城陷煜與其臣  
詣軍門請罪彬釋而禮之衆賴以全拜樞密使加  
同平章事封郡王諡武惠

李光字泰發高宗時叅政極言金人狼子野心和不  
可恃備不可撤秦檜惡之光復折檜于帝前曰觀

檜之意是欲壅蔽陛下耳目弄權悞國檜大怒光遂求去史以李綱張浚趙鼎並稱洵有自云

虞允文字彬父舉進士慷慨有大志言動有則度人望而知爲任重之器出入將相垂二十年孜孜忠勤至老愈篤采石之戰允文儒生以七千卒却虜兵四十萬宋事轉危爲安及其與陳俊卿並相也以人材爲急嘗籍爲三等有所見聞卽記之號材館錄故所用皆知名士封雍國公贈太傅諡忠肅論曰宋受周禪南唐主極盡臣禮度亦勲佐輩佐輔知大義耳曹彬率師下江南誓軍士不妄殺一

上元縣志

卷十五

先賢

三

人可謂樹厚德矣李泰發在高宗朝極言和不可恃備不可撤虞允文以書生禦虜采石大戰克捷宋之轉危爲安孰非二三臣之力哉

范純仁字堯夫仲淹次子天姿警敏皇祐元年舉進士調武進縣以遠親不赴仲淹沒乃出仕爲侍御史時議濮禮不合還所授告敕家居旣而詔罷追尊起純仁就職宣仁垂廉司馬光將盡改熙豐法度純仁謂去其太甚者可也光不從純仁曰是使人不得言爾若欲媚公以爲容悅何如少年合安石以速富貴哉純仁素與光同志及臨事規正類



如此元祐初拜尚書右僕射蘇轍殿試策問引漢  
昭變武帝法度事哲宗震怒曰安得以漢武比先  
帝轍下殿待罪衆不敢仰視純仁言武帝雄才大  
畧史無貶詞且轍所論事與時也非人也哲宗爲  
之少霽轍平日與純仁多異至是乃服謝焉性夷  
易寬簡不以聲色加人誼之所在則挺然不少屈  
自爲布衣至宰相廉儉如一嘗曰吾平生所學得  
之忠恕二字耻與章惇同相堅請去建中靖國改  
元之旦受家人賀明日熟寐而卒年七十五贈開  
府儀同三司謚忠宣

上元縣志

卷十五

先賢

十四

張詠字復之甄城人有治才真宗朝以禮部侍郎知  
昇州供奉官鄭志使昇州還言黃雀飛蔽日又聞  
空中若水聲真宗因出書示王旦曰此皆民勞之  
兆張詠在彼吾無慮矣城中多火詠廉得不逞之  
人潛肆燔焚者斬之由是遂絕三年昇人以詠秩  
滿願借留卽授工部尚書令再任仍下詔褒獎殿  
直范延貴過金陵詠問延塗好官貴以萍鄉宰張  
希顏對詠曰何以知之對曰自入縣境橋道完田  
野闢市無賭博更鼓分明以是知其必善政也詠  
大笑曰希顏固善政天使亦好官也卽日同薦於

朝皆號能吏詠壽言州當水邊要衝有克頌屢犯者請並許刺配是秋以江左旱歉命充昇宣等十州安撫使出手札諭復進禮部侍郎後以疾代而還

李及字幼幾范陽人調昇州觀察推官資質清介所治簡嚴喜薦下吏而樂道人之善冠隼薦其才擢大理寺丞

包拯字希仁合肥人天聖中知江寧府政務敦厚雖甚嫉惡而未嘗不推以忠恕與人不苟合不爲辭色悅人平居無私書故人親黨皆絕之雖貴衣服

上元縣志

卷十五

先賢

五

器用飲食如布衣時召權知開封府累官樞密副使謚孝肅

程顥字伯淳河南人嘉祐八年上元主簿爲令畫法均田稅攝邑盛夏塘堤大決法當言之府府稟於漕然後計功課役非月餘不能興作顥曰如此苗稿矣民將何食救民獲罪所不辭也遂發民塞之歲則大熟運卒病者舊爲營以處歲數百人至者輒死顥察其由蓋旣留然後請於府給券乃得食比有司文移具則困於飢已數日顥白漕司給米貯營中至者與之食自是生全者大半茅山有龍

池其龍如蜴蜥而五色自昔嚴奉以爲神物顯捕而脯之使人不惑其始至見人持竿黏飛鳥取其竿折之自是鄉民子弟不敢蓄禽鳥不嚴而令行大率如此顯資性過人充養有道和粹之氣蓋於面背自十五六時與弟頤聞汝南周敦頤論遂慨然有求道之志教人自洒掃應對至於窮理盡性循循有序卒謚純公封河南伯頤謚正公封伊陽伯俱從祀 文廟

鄭俠字介夫其先福清人治平初隨父輩赴江寧府監稅得清涼寺一小室閉戶讀書時王安石以中

上元縣志

卷十五

先賢

六

書舍人寓金陵俠攜所業往見安石稱許之擢進士甲科調光州司法以歸相見愈厚及俠赴光安石入叅大政俠數言新法之害不聽後監京安上門屢上書言事繪流民圖以進被謫還鄉所餘惟一拂而已因號一拂居士年七十九卒謚曰介後人爲祠於清涼寺以祀之凡州縣皆祀之於學真德秀字希元浦城人嘉定八年以朝請郎秘閣修撰任江淮轉運副使江東大旱且蝗德秀請蠲夏稅於朝遂發本道義倉及轉搬米數十萬斛取郡縣吏及寓公之賢者分部賑之民賴以生建明道

書院開新河於東門外創漕司貢院於青溪之西積誠禱於白鷺洲兩大需活數十萬計及歸朝將大用則既衰矣然自韓侂胄立偽學之名凡近世儒書皆顯禁絕之德秀晚出慨然以斯文自任講習而服行之正學遂大明於後

論曰范堯夫耻與章惇同相凜然正色矣張復之知昇州供奉李幼幾觀察推官真希元江淮轉運使包孝肅知府事蓋宋昇州類以親王重臣爲尹故地多屏翰而民獲生全程伯淳主簿攝令苟利於民專決行之鄭監門流民繪圖青苗旋罷仁人

上元縣志

卷十五

先賢

七

之言其利溥哉

宋楊時字中立南劍將樂人熙寧九年進士調官不赴以師禮見程顥於潁昌其歸也顥目送之曰吾道南矣顥死又見頤於洛久之歷知瀏陽餘杭蕭山三縣皆有惠政教授荊州四方之士遠來從之游號曰龜山先生高麗國王問宋使龜山安在使還以聞召爲著作郎疏斥童貫又諫阻割三鎮之議高宗卽位除工部侍郎陛對言賢君以典學爲務乞恤勤王之師乞寬假言者已而告老以著書講學爲事卒年八十三謚文靖浮沈州縣四十有

七年晚居諫省僅九十日凡所論列皆切世道而其大者則闢王氏經學排建康和議使邪說不作凡紹興初崇尚元祐學術朱熹張栻得程氏之正其原委脈絡皆出於時云

朱熹字元晦徽州婺源人父松進士歷司勳吏部郎以不附和議忤秦檜出知饒州未上卒熹幼穎悟嘗從羣兒戲沙上獨端坐以指畫沙上視之八卦也家故貧少依父友劉子羽寓建之崇安後徙建陽之考亭年十八貢於鄉中紹興十八年進士第歷五十載仕於外者僅九考立朝纔四十日所上上元縣志

卷十五

先賢

六

書疏封事凡數萬言皆關乎君德治體國計民生之大每進講務積誠意以感動主心其在浙東訪求民隱按行境內單車屏徒從所至人不及知郡縣官吏憚其風采至自引去所部肅然晚爲沈繼祖誣奏落職卒年七十一贈華文閣待制謚曰文穆理宗時贈太師追封徽國公從祀文廟

國

朝康熙五十年特旨升附十哲之次其爲學大抵窮理以致其知反躬以踐其實而以居敬爲主謂聖賢道統散在方冊聖經之旨不明道統之傳始晦因是竭其精力以研究聖賢經訓黃榦曰道之正

統待人而後傳自周以來任傳道之責者不過數人而能使斯道章章較著者一二人而止耳由孔子而後曾子子思繼其微至孟子而始著由孟子而後周程張子繼其絕至熹而始著子在紹定中爲吏部侍郎

吳柔勝字勝之宣州人幼聽其父講伊洛書已知有持敬之學不妄言笑長游郡泮人皆憚其方嚴登淳熙八年進士第除國子監正以朱熹四書與諸生誦習又於生徒中得潘時舉呂喬年白子長擢爲職事使以文行表率於是士知趨向伊洛之學

上元縣志

卷十五

先賢

九

晦而復明出知隨州時再議和尤戒開邊隙凡旁塞民事與北界相涉者不問輕重法皆殺之郡民梁臯有馬爲北人所盜追之急北人以矢拒臯臯與徒亦發二矢北界以爲言郡下七人於獄勝之至立破械縱之具始末報北界而已收豪傑孟宗政扈再興隸帳下後皆爲名將築州城營柵器械悉備改湖北運判兼知鄂州甫至歲歉卽乞糴於湖廣大講荒政十五州災民皆全活改直文華閣除秘閣修撰卒謚正肅

論曰兩程子得吾道正學之大凡而龜山其親炙

者也迹其在諫垣值安石僞行經學辭而闕之廓如則亦能言距楊墨之徒矣考亭集關濂洛之大成

國朝功令升祔十哲之次蔚然儒宗吳勝之除國子正以考亭四書與諸生誦習伊洛之學晦而復明偉哉

李綱字伯紀祖贖自邵武徙居於無錫登政和二年進士以敢言著聲金將攻汴宰執議請暫避敵鋒綱力陳不可去曰六軍父母妻子皆在都城願以死守萬一中道散歸陛下孰與衛上感悟輟行綱

上元縣志

卷十五

先賢

三

治守戰之具不數日而畢敵兵攻城綱身督戰斬酋長十餘人衆數千人金將引退求遣大臣至軍中議綱請行不聽姚平中勇而少謀率步騎夜斫敵營不克金使來詰遂罷綱太學生陳東等詣闕上書明綱無罪軍民不期而集者數十萬命綱復充京城四壁守禦使下命能殺敵者賞衆無不奮躍金人懼稍稍引退除綱知樞密院事會耿南仲忌綱遂補外高宗卽位拜尚書僕射疏陳十事因薦張所爲河北招撫使傅亮爲河東經制副使有詔欲幸東南綱極論其不可不報乞身歸田自綱

罷張所以罪去傅亮以母病辭歸招撫經制二司皆廢車駕遂東幸兩河郡縣相繼淪陷凡綱所規畫軍民之政一切廢罷金進攻東西入毀關輔而中原盜賊蠭起矣紹興十年薨贈少師綱負天下之望以一身用舍爲社稷生民安危忠誠義氣凜然動乎遐邇每宋使至燕山必問李綱趙鼎安否其爲遠人所畏服如此

張浚字德遠綿竹人紹興六年命浚渡江徧撫淮上諸戎浚入覲力請幸建康三十一年春金騎充斥王權兵潰劉錡退歸鎮江遂改命浚判建康府兼

上元縣志

卷十五

先賢

三

行宮留守浚至岳陽買舟冒風雪而行遇東來者云敵方焚采石烟燄漲天慎無輕進浚曰吾赴君父之急知直求乘輿所在而已乘小舟徑進過沔陽聞亮死餘衆猶二萬屯和州李顯忠兵在沙上浚往犒之一軍見浚以爲從天而下浚至建康卽辦行宮儀物請乘輿亟臨幸高宗幸建康浚迎拜道左風采毅然軍威皆倚以爲重高宗將還臨安勞浚曰卿在此朕無顧慮矣卒諡忠獻

韓世忠字良臣延安人風骨偉岸目瞬如電鷲勇過人年十八以敢勇應募調遣銀州斬關殺敵又以



偏將從王淵討方臘禽之苗傅劉正彥反世忠會  
送行在誅之高宗手書忠勇二字搦旗以賜兀朮  
入侵世忠與持黃天蕩者四十八日每戰梁夫人  
親執桴鼓敵衆披靡兀朮窮蹙祈請世忠曰還我  
兩宮復我疆土則可以相全兀朮語塞謂諸將曰  
南軍使船如使馬奈何一夕潛鑿渠三十里絕江  
遁去紹興四年金人與劉豫分道南侵世忠奉召  
自鎮江濟師親提騎兵駐大儀勒五陣設伏二十  
餘所候金兵至江口鳴鼓伏兵四起旗色與金人  
旗雜出金軍亂官軍迭進敵被甲陷泥淖世忠麾

上元縣志

卷十五

先賢

三

勁騎四面蹂躪人馬俱斃餘衆驚潰此爲中興武  
功第一進少保置司楚州兵僅三萬而金人不敢  
犯進太保封公世忠性贗直忠義事關廟社必流  
涕極言岳飛寬獄舉朝無敢出一語世忠獨嬰檜  
怒同在政地一揖外未嘗與語又抵排和議觸檜  
尤多持軍嚴重與士卒同甘苦器仗精絕嘗中毒  
入骨以強弩括取之十指僅全四不能動刀痕箭  
瘢如刻畫然解兵罷政卧家凡十年澹然自如若  
未嘗有權位者薨贈太師封蘄王謚忠武

岳飛字鵬舉相州湯陰人少負氣節事母孝沈厚寡

言家貧力學生有神力立志慷慨以必取中原滅  
讐敵爲念積功加少保封公高宗手書精忠岳飛  
字製旗以賜初飛奏襄陽六郡爲恢復中原根本  
今當先除腹心之疾於是渡江與僞將京超等戰  
連捷復鄂隨鄧唐信陽軍襄陽平楊么據洞庭飛  
招諭其黨黃佐楊欽先後來降表授武義大夫皆  
感泣誓死以報入湖揜賊營降其衆數萬么窮迫  
投水牛臯禽斬之兀术有勁軍號拐子馬官軍不  
能當飛以計仆之官軍乘勝奮擊遂大敗之盡磁  
相開德澤潞晉絳汾隰之地皆期日興兵與官軍

上元縣志

卷十五

先賢

三

會自燕以南金號令不行中原大震兀术欲簽軍  
以抗飛河北無一人從者其統制統領皆率所部  
來降卽黥桀如烏陵思謀者亦諭其下曰毋動俟  
岳家來卽降以至禁衛龍虎大王千戶之屬皆受  
飛旗榜自北來降又韓常欲以五萬衆內附飛喜  
謂其下曰直抵黃龍府與諸君痛飲耳方指日渡  
河而一日奉十二字金牌矣班師民遮馬痛哭飛  
亦憤惋泣留五日以待其徙從而南者如市飛既  
歸所得州縣復失之秦檜以飛不死終梗和議力  
謀殺之死時年三十九孝宗卽位詔復飛官以禮

改葬求其後官之建廟於鄂謚武穆追封鄂王  
楊邦乂字希稷吉水人建康府教授改知溧陽會叛  
卒周德據府城邦乂設計擒之以勞授通判建康  
建炎三年死節事聞贈直秘閣卽死所立廟賜額  
褒忠謚忠襄

文天祥字宋瑞又字履善吉水人體貌豐偉美皙如  
玉秀眉長目顧盼燁然自爲童子見學官所祠鄉  
先生有謚忠者卽欣然慕之曰沒不俎豆其間非  
夫也年二十舉進士對策萬餘言理宗親拔爲第  
一考官王應麟曰是卷古誼若龜鑑忠肝如鐵石

上元縣志

卷十五

先賢

十四

臣敢爲得人賀後值天步艱難自江西結豪傑提  
兵勤王至臨安請分天下爲四鎮書奏不報崎嶇  
海澳嶺南間幾死者數矣軍中疫起一子死焉天  
祥愈奮厲至五坡嶺元兵突至被執吞腦子不死  
護送赴燕道經吉州痛恨不食八日猶生乃復食  
至燕不屈元主屢欲用天祥使人諄切諭意天祥  
曰願賜一死足矣臨刑南向再拜而死數日妻歐  
陽收其屍面如生年四十七其衣帶中有贊云是  
後連日陰晦道士張宗演曰此殆殺文丞相所至  
也元主乃加贈謚書神主設壇祭之方祭狂飈旋

起捲其神主於雲霄中空中隱隱雷鳴天色愈暗  
宗演復曰文丞相留京七年乃心宋室至死不易  
今朝廷贈諡若此必戾其生前之志故靈魂震怒  
可亟易之乃改書前宋少保右丞相信國公天始  
開霽

論曰古之所謂社稷臣者嘗以其身之出處進退  
係天下之安危李伯紀在而金人郤伯紀去而關  
輔毀譚太保爲中興武功第一岳鵬舉忠勇蓋世  
微金牌僞詔不幾痛飲黃龍府哉張浚判建康府  
高宗臨幸迎拜道左風采毅然軍中倚以爲重楊  
希稷以勞授通判建康建炎三年以死節聞文丞  
相徙倚嶺南是知其不可而爲之者與

張栻字敬夫忠獻公浚之長子生有異質穎悟夙成  
忠獻愛之自其幼學而所以教者莫非忠孝仁義  
之實旣長命往遊胡仁仲之門問程氏學先生一  
見知其大器卽以所聞孔門論仁親切之旨告之  
栻以是益自奮勵直以古之聖賢自期嘗隨忠獻  
公居建康卽天禧寺竹間構屋讀書名南軒學者  
因稱南軒先生云

蘇軾字子瞻眉山入弱冠博通經史舉制科累官至

翰林學士嘗往來金陵間題詠甚富軼器識闕偉  
議論卓犖同時羣臣無出其右者卒謚文忠

馬光祖字華父金華人寶祐三年以寶章閣直學士  
知建康府拜端明殿學士知江陵府開慶元年再  
知建康修明道南軒書院及上元縣學建平糶倉  
貯米十五萬石又爲庫貯糶本二百餘萬緡發糶  
常減價以利小民修飭武備拓要害境賴以安歷  
叅知政事知樞密院致仕謚莊敏

論曰張敬夫游胡仲仁之門得程氏學讀書天禧  
寺中東坡謫陽山再謫儋耳名節自負取戾於時  
上元縣志 卷十五 先賢 美  
馬華父兩知建康微獨惠澤到今蓋亦杖履風流  
依依如昨云

明薛瑄字德溫河津人永樂年進士擢御史手錄性  
理大全晨夜玩讀潛思有得秉燭疾書提學山東  
生徒翕然愛敬三楊言於王振擢大理少卿欲瑄  
一見振瑄正色拒之振聞憾瑄會有獄瑄辨其寃  
三駁臺官諂事振劾瑄受賄棄律出人死罪坐繫  
獄得大臣仲救免歸景泰間任南大理卿蘇松饑  
民以貸粟不得遂火富人屋王文訊坐謀叛瑄抗  
章辨獲免裕陵復位入內閣諫阻徵獅西番不聽

又曹石用事遂引疾致仕其學貴乎踐履辭受取與必揆諸義接人以誠出處大節光明峻潔晚造詣純熟卒年七十三諡文清

陳獻章字公甫新會人正統間舉人身長八尺目光如星右臉有七星如北斗狀穎悟絕人兩上禮部不第聞康齋講伊洛之學遂往從之遊成化時布政使彭韶督府朱英交薦召至京就試吏部以疾辭疏乞終養特授翰林檢討歸白沙凡古聖賢經訓無所不講後舍繁求約靜坐久之然後見此心之體隱然呈露日用間種種應酬隨吾所欲如馬

上元縣志

卷十五

先賢

毛

之御銜勒也體認物理稽諸訓誥各有來歷如水之有源也晚年德器粹完脫落清洒獨出造物牢籠之外而寓言寄興於風烟水月之間蓋有舞雩陋巷之風焉學者稱白沙先生

王守仁字伯安餘姚人學者稱陽明先生登弘治二年進士授刑部主事正德元年劉瑾亂政首抗疏乞誅瑾謫貴陽驛丞陞廬陵知縣明年瑾誅陞南刑部主事累陞僉都御史巡撫南贛甫蒞政榜曰求通民情願聞已過是時茶寮賊大起江廣湖郴騷然三四年矣陽明計擒其魁乘勝逐北賊藪盡

爲治境吉人立生祠祀之至贛開書院講學設社學教民習禮嶺北風俗丕變十四年宸濠反陽明大集兵士戰而擒之嘉靖改元敘功封新建伯兼南兵部尚書未幾外艱去六年因岑猛黨盧蘇王受等再叛命督兩廣軍務開示恩信蘇受等自縛來歸卒用其力夾擊入寨劇賊悉平其地閣輔桂萼素忌陽明言其挾詐專兵以病乞歸至南安卒於舟年五十八桂萼又奏停其卹典嗣封隆慶初用諫官言乃贈新建侯子孫嗣伯爵陽明未第時讀書南雍從尹蓬頭遊卽以勲業期之尤篤志於

上元縣志

卷十五

先賢

五

性命之學晚年學益邃發良知之旨人多從之鄒守益王艮王畿錢緒山皆其高弟

論曰三君子真學者也惟有大學問斯有大志節薛德溫踐履篤實故能抗節不一見王振陳檢討辭祿終養性天洒落出造物牢籠之外而風月雲煙差足自賞此其原泉混混矣陽明良知之說起於孟子自朱陸分門後世學者用是譏訕姑置弗論第其撫南贛討宸濠以功封新建伯豈小儒所能軒輊者哉

上元縣志卷十五 名宦

名宦祠祀

漢魏相字弱翁定陶人揚州刺史考案守相多所貶退及爲丞相嘗上封事凡四方異聞或有逆賊災變輒奏言之其諫伐匈奴書尤切在他人不知爲憂者相獨知憂之與丙吉同心輔政上倚重焉封高平侯謚曰憲

何武字君公郫縣人爲吏守法盡公進善退惡其所居無赫赫名去後常見思爲揚州刺史二千石有罪應時輒奏其餘賢不肖敬之如一是以郡國各重其守相行部必先卽學宮見諸生問以得失然後入傳舍問墾田美惡已廼見二千石進大司空以不附王莽被害人咸惜之

李忠字仲都黃縣人建武六年爲丹陽太守時海內新定海濱江淮多擁兵據土忠招懷降附其不服者悉誅之旬月皆平起學校習禮容春秋鄉飲選用明經郡人向慕之墾田增多三歲流民占著者五萬餘口三公奏課爲天下第一遷豫章太守褚翹字謀遠陽翟人蘇峻之亂京邑焚蕩人物凋殘乃以翹爲丹陽尹翹收集散亡甚有惠政遷都之



議始寢

論曰金陵禹貢揚州域也以專屬而言廣陵爲揚州之治所以分野而言金陵爲揚州之大郡金陵亦號丹陽以揚州而定也魏何皆刺揚州李褚丹陽守令以故政教所至官跡在焉

宋呂蒙正字聖功河南人擢太平興國二年進士第一通判昇州累陞昭文館大學士同平章事立朝侃然陳言同列多其直諒會營永熙陵奉家財三百餘萬以助用葬日伏哭盡哀人以爲得大臣體景德二年春表請歸洛上嘗兩幸其第謂蒙正曰

上元縣志

卷十五

名宦

二

卿諸子孰可用對曰諸子皆不足用有姪夷簡任絳州推官宰相才也富弼纔十許歲蒙正見而驚曰此兒他日名位與吾相似而勲業遠過於吾今與諸子同學供給甚厚其知人類如此卒年六十八贈中書令封許國公謚文穆

趙鼎字元鎮解州聞喜人生四歲而孤母樊教之通經史百家之書登崇寧五年進士起家縣令金人陷太原廷議割三鎮地以與之鼎力言其不可已而徽欽北行金人議立張邦昌鼎逃入太學不肯書議狀高宗初請罷王安石配享又言吳越介在

一隅若欲經營中原當自關中始經營關中當自蜀始欲事蜀當自荆襄始史頤浩惡其異已改鼎學士頤浩罷復爲中丞紹興五年拜尚書左僕射進言張浚才可大用上乃命浚爲右僕射視師江上遣其屬入奏事所言誇大鼎每抑之浚因論事語意微侵鼎鼎遂求去七年浚有罪當遠竄鼎鼎復入相捐棄前釁奏浚母老且有勤王功上怒未釋力懇乃獲免嘗闕和議與秦檜忤檜擠之謫居吉陽軍謝表有白首何歸悵餘生之無幾丹心未泯誓九死以不移之句檜曰此老倔强猶昔命本軍

上元縣志

卷十五

名宦

三

公  
月具存亡申報鼎知其必欲殺已乃自書銘旌云身騎箕尾歸天上氣作山河壯本朝不食而死天下聞而悲之孝宗卽位謚忠簡贈太傅追封豐國公  
劉珙字共父崇安人淳熙二年知建康歲祲奏蠲夏秋額稅禁止上流遏糴得商米三百萬斛又貸錢出糴得米四萬九千斛籍戶高下給米有差兼運米邨落置場平糴閭境無捐瘠流徙者卒於官百姓罷市巷哭立祠祀之

汪立信字誠甫唐忠烈王華之裔由六安移居建康

淳祐六年進士荆湖制置趙葵辟充參議官嗣差知江陵府襄陽圍急上疏請益兵移書賈似道謂宜盡出內郡兵於江干以禦外距百里而屯屯有守將十屯爲府府有總督其要害處輒三倍其兵首尾相應戰守並用似道得書大怒投之於地咸淳十年元兵入復以信爲江淮招討使俾就建康募兵以援江上諸郡信卽日上道與似道遇蕪湖似道哭曰不用公言以至於此今公何向信曰江南無一寸乾淨地某尋一片趙家地上死爾至建康守兵悉潰手爲表起居三宮悲失聲三日扼吭

上元縣志

卷十五

名宦

四

而卒其愛將金明扶櫬歸葬丹陽及伯顏入建康嘆曰宋有是人使果用我安得至此

論曰呂聖功宋賢相也書云知人則哲聖功薦姪夷簡有宰相才可謂哲矣趙元鎮薦張浚才可大用而浚言多夸大浚負鼎鼎不負浚耳汪誠甫移書賈似道戰守並用似道抵書於地是不知似道奸者泊與似道遇蕪湖似道泣曰今公何向誠甫曰某尋趙家一寸地死耳至金陵扼吭而卒劉共父知建康有惠政埒李緒矣

明顧佐太康人永樂十六年以陝西按察副使陞應

天尹公廉有威重當官嚴毅風采凜然一時勲貴  
豪猾皆爲斂手時方之包孝肅歷左都御史百寮  
憚之時稱爲顧獨坐

鄭埜字孟質宜章人宣德十年爲應天尹一以養民  
爲務凡市征田稅皆酌其平豪猾不得爲輕重公  
私便之晉秩兵部侍郎贈少保諡忠肅

王爌字存約黃巖人弘治壬戌進士嘉靖初爲應天  
尹奏革織匠銅作匠守庫薪夫等八百餘人裁齊  
庶人供億節中使浮餼籍記縣司丁錢使諸司不  
得恣取冗費一清他如議罷京邑種馬議輕荒稅  
上元縣志

卷十五

各宦

五

蘇流亡議科田出賦均貧富䟽數十上皆切中時  
病平居恂恂若無甚可否至臨大節決大疑則毅  
然不可奪有京兆遺愛錄傳於世

魯崇志字懋功天台人由進士爲應天尹歲饑民逋  
賦數萬石崇志勸貸以輸而賑其貧者中貴人王  
敬怙勢以鹽二萬引鬻規重利崇志厲色拒之愷  
悌詳雅一介不苟取與尤加意士子儒學櫺星三  
門皆其創建云

汪宗伊字子衡崇陽人隆慶初爲應天尹條畫上元  
江寧徭賦歲省萬餘金著爲額諸濫差爲民害者

皆奏罷之

錢士貴字元冲松江人由進士爲應天丞時歲屢不登勸諭積穀力行賑濟有不能納贖久繫獄中者士貴捐金代納俸入不給至變產以償囹圄爲之幾空

李棠字英拔平和人萬歷間擢判京兆轉治中嘗攝理刑及兩縣事於訟獄多所平反民稱神明溧水漕卒糧戶交關幾成變亂棠奉檄往按之片言立解

龐嵩字振卿由鄉舉授應天通判晉治中屢攝府事

上元縣志

卷十五

名宦

六

督賑飢民蠲其積逋拊循勞來復業者衆部民苦役重嵩議寬之建會規於新泉書院日與諸生講習成就爲多嵩天性嚴明見義勇爲單騎行縣所至肅然一蔬片楮不以擾民人目爲龐青天云論曰禹貢賦第九等揚州厥土塗泥厥田下下洎晉南渡偏安六朝金粉明祖定鼎金陵東南之賦迺甲天下蒞斯土者誇外飾之豪華掩中藏之彫敝雖宣尼坐車中亦必嘆其庶且富矣顧鄭魯注王諸尹或以嚴毅而折貴勲或以均平而酌征稅或以勸貸而舒疾困或以奏革而甦創瘼石頭鍾

山之間庶有瘳乎錢元冲力行賑濟李英拔獄冬平反屢振卿單騎行縣其治中別駕之能展驥足者與

許存仁名元以字行浙之金華人元末明太祖幸金華與語大悅卽拜京學教授鑄印使佩之仍命入傅皇太子及諸王乙巳置博士助教學正學錄典樂典書典膳等官以存仁爲博士丙午冬進祭酒奉燕閒備顧問最見禮遇出入兩宮者垂十年

張統字昭季富平人洪武初舉明經授京學教授尋遷東宮侍書懿文太子器重之累官吏部尚書永

上元縣志

卷十五

名宦

七

樂初自經死

鄧德昌字順之廣東人陳獻章弟子爲京學司訓以實行誘進諸生無敢搽費及門者嘗歎曰士始入黌舍如處女然而我輩首以利導之欲成人材正風俗得乎尚書湛若水霍韜望重一時與德昌爲同志友屏騶從徒步入邸談道問政移時乃去

鄭汝舟字宜濟莆田人嘉靖中應天教授誨迪多士必約之矩矱寮友有講學者汝舟曰六經語孟聖賢心印熟讀而躬行之卽學也何以唇吻標異哉有勲貴勢炫赫傾動京師諸達官皆與之交嘗盛

治具召汝舟堅謝不往

楊以任字維節江西人崇禎中應天教授誨迪不倦諸生感悅卒於官服心喪者數百人

論曰舜命契作司徒敬敷五教在寬命夔典樂教胄子師儒之官蓋以教民尊居親上佐成治化也明祖幸金華召許存仁與語大悅卽拜京學教授入傅皇太子及諸王嗣是張統繼之尋遷東宮侍書與存仁同鄧德昌京學司訓得白沙之清楊以任應天教授卓然以師道自任鄭汝舟謂六經語孟聖賢心印旨哉言乎

上元縣志

卷十五

各宦

八

耿定向字在倫黃州麻城人登隆慶丙辰進士授行人逾年宣詔於楚首列冢宰吳鵬六事語侵分宜甚辛酉督南畿學政建崇政書院著會儀遴十四郡髦士羣而鼓鑄之屬太史焦竑領其事徐文貞公以理學名卿首揆席設簾待賢下及筦庫視定向不啻天符人瑞而定向踞師儒之任凡六年摩盪鏃礪得未曾有逮江陵當國定向爲其桑梓又夙所推重屢進苦言江陵卒瑱其規不以受而定向自此疏矣累官戶部倉場尚書九疏乞休家居糲糧屏履丈室蕭然暇率羣從入天臺山逍遙其

聞學者因稱天臺先生卒年七十有七謚恭簡  
戴珊字廷珍浮梁人成化間以御史視學南畿珊剔  
歷中外所至有聲績學政尤著

孫鼎字宜鉉廬陵人以御史督學南畿課藝之外更  
訓飭士子當以躬行爲本一時感其德化皆鏤礪  
文行無敗檢者

陳選字士賢天臺人成化中以御史視學南畿力變  
浮華以身律士士多感化

婁謙成化間以御史督學南畿名其堂曰畏天中官  
汪直新幸銜謙不與通使偵伺其短竟莫能得

上元縣志

卷十五

各官

九

論曰宋崇寧二年置提舉學司掌所部州縣之優  
劣生員之勤惰而專舉刺之事任綦重矣然以視  
三代之建學設官其相去何如也耿天臺踞師儒  
之席以道自重一時領其事者焦徐兩公彬彬稱  
盛婁謙名其堂曰畏天絕中官汪直不與通陳士  
賢以身律士孫戴刻意選造所至有聲記曰三王  
四代唯其師其庶幾與

王道字純甫武城人正德辛未進士選翰林庶吉士  
屢遷南國子祭酒吏部侍郎少馳騁詞翰鄉試爲  
陽明所舉聞其說乃研精理學自學秩歷銓曹兩



誰執法端教表率人倫期於俗變風美而後已自  
奉如寒素布衣疏食淡如也於書無所不窺所著  
有大學億老子億易書詩春秋等億諸史論斷大  
學衍義論斷若干卷

王恕字宗貫三原人正統十三年舉進士選庶吉士  
博學果練喜以經術用世累遷左都御史巡撫南  
京兼總督糧儲當是之時宦戚閣部各引置私朋  
惟恕著節無所撓大臣皆側目於是遂落職孝宗  
召爲吏部尚書抑僥倖獎名節拔淹滯人莫敢私  
干者卒贈太師謚端毅

上元縣志

卷十五 名宦

十

海瑞字汝賢瓊山人由舉人授南平教諭遷淳安縣  
總督胡宗憲子還自父任索驛夫不給倒懸驛吏  
傳亭下瑞曰胡大人清廉今其裝重盛必非胡大  
人子發裝金數千納之庫都御史鄒懋卿行部勢  
焰赫奕至瑞縣聞前事歛威去尋擢戶部主事疏  
諫修元觸帝怒詔繫錦衣獄穆宗卽位詔復瑞故  
官累遷都御史總督南京糧儲一以通民隱抑強  
橫爲主未幾解任萬歷間特起南右都御史自始  
仕至此凡三十年日食飧蔬冬不具裘鞞穿至一  
再葺卒年七十四謚忠介

周忱字恂如吉水人任江蘇巡撫二十三年疏減蘇州額稅八十餘萬令縣立便民倉水次推糧長收兩稅加耗不得過十一其餘善政多端永著爲則江南人愛戴如父母没而尸祝至今思周尚書也丁賓字廷禮嘉善人由縣令歷擢江都御史諸大利弊多所興革蠲三等九則之法輸錢官募題定稅役事宜坊廂踐更之累皆絕

陳玉輝萬歷間屯馬御史水清自矢去之日行貲不辦同官釀金助之

馮叔吉字汝迪萬歷初江上有警設副使道於池州

上元縣志

卷十五

名宦

七

叔吉蒞任卽立池陽荻港二營列巡艦於江上加築池州及東流銅陵二邑城守禦旣嚴盜警遂息周起元字綿貞海澄人天啓間巡撫吳中爲政簡靜持大體性剛介織造內監李實怙魏忠賢勢恣爲貪暴起元疏劾之忠賢嗾實劾起元與周順昌等六人同被逮死獄中

論曰古之大臣以安社稷爲悅也一省之廣督撫大吏乃心王室而務與民休息一切吏治之醇疵民生之休戚講明而剔釐之政烏有不善事烏有不理者金陵在昔爲陪京勲戚閣部甲第連雲王

宗書著節無所撓以是落職周恂如疏減蘇州鹽稅八十餘萬海汝賢總督糧儲一以通民隱抑強橫為主可謂知治道矣王純甫祭酒研精理學不負陽明所舉丁廷禮操江覈三等九則之法心乎民也陳玉輝御史去之日行賁不辦何一廉至此馮叔吉池州副使設營築城以禦賊警周綿貞在天啓朝忤忠賢與順昌等六人被逮死於獄易曰王臣蹇蹇匪躬之故其以是與

黃承元字與參浙江秀水人中萬歷丙戌進士游歷藩臬幾二十年授應天府尹下車之始首咨民瘼

上元縣志

卷十五

名宦

七

亟議興革考嘉靖甲子舊例請增科舉至三十餘人入學至二十餘人又捐府帑增號舍二百間使士無蓬號輻號之苦凡科場一切供億悉出帑金平值貿易不以累民所給諸生茗餌羹糝之屬無不精好以至油燭石研皆官爲辦之貧生得沾實惠往年遇科場官之徵發民之輸將上下征取幾無寧日承元任事都城寂若無聲而事皆克辦時已拜撫閩之命爲停驂以終事他如嚴署篆之選軍加耗之弊禁保家之法詰胥吏之奸通鼓鑄之利焚織造之籍精考校之法拔幽滯之才爲尹僅

踰年而德輿風行士民至今思之不忘

國朝馬國柱奉天人順治四年總督三省時江南八旗駐防兵與民不相習國柱盡心撫戢令行禁止兵民相安

麻勒吉滿洲人康熙十年總督兩江甫蒞任值旱蝗倣行古埋蝗之法又捐俸買蝗遠近負戴而至量多寡授緝蝗漸絕歲不告饑其爲治提綱挈領務有所振起凡藩臬郡縣學校營衛驛遞場局市井一切利弊宜罷行者及舟車往來人物之數各有品章條貫芟繁核實不苛不濫士民感其尤著者上元縣志

卷十五

名宦

三

三十八條鑱之於碑立祠祀之

郎廷佐字一柱奉天廣寧人由豫撫陞兩江總督甫下車卽建言請紓江南三大困一時便之己亥六月寇鯨犯長江都城戒嚴駐防某恐內城民與賊通將盡殲焉廷佐屈膝勸又邀駐防夜行察民間雞犬皆無聲事乃解時賊軍白土山近得勝門故塞不通廷佐飛檄調總兵梁化鳳入援由得勝門破壁而出賊不知所措遂潰江南半壁危而復安皆廷佐力也

梁化鳳字翀天榆林人丙戌武進士自寧國總兵官

移鎮崇明時海疆伏莽出沒無時化鳳收復平洋  
平安大安聯福等沙順治十六年海逆犯江寧省  
會震動化鳳奉調援勦衝圍入城與城中守兵合  
化鳳率精兵從間道出奮勇搏戰軍聲大震力復  
潤城保護內地捷聞陞蘇松提督于世廕

陳培貞字心盤奉天人順治十三年江南左布政使  
時海寇犯江寧城中居民多憂糧置培貞請開聚  
寶門聽民運米入城衆心始安賊營環列城外培  
貞建議潛開小東門與崇鎮梁化鳳引兵突出繞  
賊營後一戰破之小東門者城西北之東偏小門  
上元縣志

卷十五

各宦

古

也久閉塞忽出不意賊大驚潰遂以捷聞總督郎  
廷佐並上其功

馮如京振武衛人江南右布政使持已率屬峻整有  
風采尤能振興文教立五經文會訓勵多士士皆  
習尚經學云

王緒祖字繼之奉天廣寧人由侍衛擢江安督糧叅  
政漕舊多陋規又軍餉或不時發胥吏隱尅莫可  
究詰緒祖至悉絕之值歲饑捐俸積粟糴糶以時  
軍民賴焉調兵備道郡人立去思碑紀其德

曹璽字完璧其先出自宋樞密武惠王彬後著籍襄

平大父世選令瀋陽有聲世選生振彥初應從入  
闕累遷浙江鹽法叅議使遂生璽璽少好學沉深  
有大志及壯補侍衛隨

王師征山右有功康熙二年

特簡督理江寧織造織局繁劇璽適至積弊一清幹畧  
爲

上所重丁巳戊午兩年

陞見陳江南吏治備極詳剴

賜蟒服加正一品

御書敬慎匾額甲子卒於署祀名宦子寅字子清號荔

上元縣志

卷十五 名宦

五

軒七歲能辨四聲長偕弟子歆講性命之學尤工  
於詩伯仲相濟美璽在殯

詔晉內少司寇仍督織江寧

特勅加通政使持節兼巡視兩淮鹽政期年疏貸內府  
金百萬有不能償者請豁免商立祠以祀奉

命纂輯全唐詩佩文韻府著棟亭詩文集行世孫顥字  
孚若嗣任三載因赴都染疾

上日遣太醫調治尋卒

上嘆惜不置因命仲孫頰復繼織造使頰字昂友好古  
嗜學紹聞衣德識者以爲曹氏世有其人云

論曰古之所謂社稷臣以安社稷爲悅也馬制府  
總督三省調畫駐防八旗與民相習麻公效古瘞  
蝗之法蝗不能災辦理軍國諸務皆有條理郎公  
下車請紓江南三大困疏民用又安陳心盤建議  
開小東門破賊梁翀天以是有保障殺敵之功馮  
如京作屏東南王繼之督糧叅政出納清慎曹完  
璧明於吏治幹畧特出之數公者勲在社稷其祀  
之也宜哉

熊一瀟字漢若號蔚懷先世南昌人康熙甲辰科進  
士授翰林院庶常丁未補浙江道監察御史累官

上元縣志

卷十五 各宦

六

工部尚書瀟生有異稟弱冠補博士弟子員同里  
李宗伯閩園謂人曰此君文章事業將來必居我  
上因館於東湖之別墅旋成進士由庶常改居臺  
諫先後十二年奏草凡數十上皆以厘國計恤民  
隱督鹽政時修建河東書院三省紳士歌以紀其  
事壬子八月召臺省諸臣於保和殿試河工議銓  
法疏

上親定第一戊午典江南省試拔宋衡等七十三人盡  
單寒知名士魏司寇環極頓首邸署曰吾爲國家  
慶爲斯文慶也丁未轉吏部右侍郎尋陞工部尚

書奉

命往視河上會扶疾不能奏對解組歸越五年起補太常寺卿五進階復原官已卯春乞休奉

旨准以原官致仕

賜御書怡情泉石扁額四十二年四十四年兩次謁迎聖駕褒賚彌厚年六十九卒清德素著易簣之日室內蕭然遺疏上聞

論祭全葬雍正七年制府查公學使俞公允諸生所請崇祀名宦祠所著有歷仕奏疏金臺南役等草行世子大彬行人司正次子本丙戌進士翰林院編

上元縣志

卷十五 名宦

七

修孫學烈癸未進士戶部郎中學熹乙酉舉人內閣中書學鵬庚戌進士太僕寺卿學騏辛酉舉人學驥庚午舉人曾孫之福甲子舉人

簡上字謙居蜀之巴縣人辛卯舉於鄉起家縣令歷部曹由文選郎督學江南時士風波靡上率先鼓勵以教育爲己任且請增弟子員額一時孤寒名宿盡入網羅履任六載士沐其化領狀頭解會者不絕捷春秋兩闈者益指不勝屈得人之盛其首推也上尤篤於文章知己之愛凡所拔士貧者莫不解推無所吝後除廣西右江道銳意澄清爲忌



者所中卒於官有四書彙解講義講學等錄行世  
許汝霖字時庵海寧人康熙三十年以春坊贊善督  
學江南汝霖浙中宿學通經書熟於文律其校士  
稔知甘苦宵分閱牘手定甲乙士咸服其公鑑  
邵嗣堯山西郇陽人康熙庚戌進士由清苑縣擢御  
史剛正不撓輦下肅然尋以叅議視學江南屏絕  
竿牘雅不喜冗長繁縟之詞所取制義以簡質說  
理爲宗著有四書講義傳示學者以勞卒於官士  
立祠肖像祀之

張泰交字泊谷山西陽城人由壬戌進士知太和縣  
上元縣志

卷十五 名宦

六

三年徵拜御史臺督驍長蘆擢太僕寺少卿督學  
江南公廉平明弊絕風清而尤汲汲於造士每榜  
發例當謁見訓諭數千言愷切人人皆古聖賢格  
言也踰年以廷尉召復擢刑部侍郎皆未赴陞浙  
江巡撫

余正健字惕齋閩之古田人康熙丙子解元丁丑進  
士官翰林時讀書自刻苦賃屋數椽無半刺通謁  
陞國子祭酒乙未督江南學政衡文根據理要訓  
士諄切按州郡僕從數人而已丙申擢順天府尹  
施世綸字潯江晉江籍鑲黃旗人靖海侯謚襄壯琅

仲子以廕知泰州會歲饑請修築范公隄以濟饑民歷揚州守移江寧所至臺右屏跡疑獄悉平丁艱去攀留者數萬人建雙亭於府署號一文亭累擢淮徐道安藩司總督漕運革羨金劾貪弁除蠹役號稱嚴明

張伯行字孝先河南儀封人由進士授中書以練達河務出爲河工副使道累官江蘇巡撫戶部左侍郎總督倉場奉裁峻整奸吏歛跡宿弊爲之一清康熙丁酉科順天鄉試正主試號稱得人卒於官子師戴官副總河

上元縣志

卷十五

九

陳鵬年字北溟湘潭人初知海州歷知江蘇兩府攝江藩篆並著聲績康熙六十年署河道總督雍正初授總督河道兵部侍郎時漕渠淺澀遣幹吏直溯淮源疏其上流使清水暢流會黃濟運又挑挖黃河南北岸引河四道使對岸險工淤閉又遍閱河勢地形具得源委高下區畫條貫將次第經理會病卒

賜賻金二千兩諡恪勤十二年奉

旨崇祀賢良祠

論曰祭典有功德於民則祀之士固民之首也簡

謙居所拔士如陳士芳錢晉錫皆以選貢游歷鄉  
貳後鮮有及者許海寧老宿也宵分披閱刊行試  
牘紙貴一時邵郇陽剛正不撓取文以簡質說理  
爲宗張陽城澹泊寧靜尋陞浙江中丞余古田安  
和廉雅按州郡僕從數人而已施潯江守江寧政  
教嚴明德威惟畏去之日民建亭署前號曰一文  
亭北溟不悅於制府阿公卒受主知累官河道總  
督歿謚恪勤張中丞和平愷悌理學名臣

上元縣志卷十五 表忠

表忠祠祀

方孝孺字希直台寧海人幼精敏日讀書積寸願未  
視文藝以明王道闢異端爲已任洪武十五年召  
見舉動端莊上喜謂皇孫曰此莊士當老其材輔  
汝遣還鄉蜀獻王聞其賢聘爲世子師名其讀書  
之廬曰正學皇太孫卽位擢侍講學士一時倚重  
比定官制改孝孺爲文學博士靖難兵起日召謀  
議詔檄皆出其手建文遜去文皇以姚廣孝言召  
用不屈又召孝孺草詔投筆痛哭曰死卽死耳磔

上元縣志

卷十五

表忠

諸市宗族坐死者八百七十三人時年四十六洪  
熙初詔從寬典方氏遺族始有赦還鄉者立祠祀  
之至今爲烈

齊太溧水人洪武二十一年進士累官兵部尚書太  
祖崩受顧命輔皇太孫時諸王皆尊屬擁重兵專  
制地嫌勢逼詔諸王臨邸中毋奔喪王國所在吏  
民悉聽朝廷節制詔下不說謂此齊尚書疎間我  
也文皇時自燕邸入臨至淮安太言上急出勅符  
勒歸國元年靖難兵起太專立籌畫命將出師二  
年兵日逼謫太子澄官求解兵不聽尋召太未及

還建文遜去太被執不屈死之兒甫六歲給配赦  
還故居爲舖舍人猶稱爲尚書舖云

黃子澄名湜以字行分宜人洪武十八年進士舉禮  
部第一累官至太常卿建文卽位與齊太議削奪  
諸王兵權靖難兵起子澄薦李景隆爲大將景隆  
昏懦戰輒敗棄其師遁召還京赦不誅江淮諸將  
連敗子澄慟哭曰誤薦景隆萬死不足贖誤國之  
罪金川門失守文皇執子澄責問不服族其家一  
子走易姓名田經

論曰方正學初被召上喜謂太孫曰莊士留輔汝

上元縣志

卷十五

表忠

二

蓋已岌岌爲太孫謀矣文皇在諸王中天姿英挺  
而勢嫌地逼縱無齊黃削奪計亦必不能終身安  
於藩位也特又激之使速耳希直務明王道事多  
紛更而卒無效齊黃鑑漢七國之禍而躬自蹈晁  
錯之誅悲矣然三君子之忠貫日月宜其享祀至  
今不絕也

陳廸字景道宣城人洪武八年薦辟爲郡學訓導累  
官雲南右布政使建文卽位徵廸爲禮部尚書靖  
難兵起受命督軍儲於外過家未嘗入聞變卽赴  
京師文皇繼統召廸責問廸慢罵不屈與子鳳山

丹山等六人同日就戮人於衣帶中得詩有千秋  
公論明於日照徹區區不二心之句又有五噫詞  
並悲烈蒼頭侯來保拾其遺骸歸葬

鐵鉉鄧州人累官山東叅政建文二年靖難兵圍濟  
南甚急鉉悉力防禦令軍民詐降開城門候文皇  
入急下鐵板幾中比出戰令軍士噪罵文皇窘大  
怒攻至秋七月不能克舍之南去文皇登極鉉尚  
擁殘兵駐淮南已而擒鉉至不肯屈令一顧終不  
可得至死罵不絕聲

黃觀字瀾伯洪武二十四年會試禮部第一建文中

上元縣志

卷十五表忠

三

位侍中與方齊並見信用四年奉詔募兵上游且  
督諸郡勤王至安慶聞變痛哭謂人曰吾妻翁有  
志節必不辱招魂葬之江上明日家人自京奔至  
言翁夫人暨二女同被執有象奴得之索釵釧出  
市酒散夫人急携二女率家屬十人投淮清橋下  
死觀痛哭至李陽河聞建文避位朝服東向再拜  
投湍流中

恭昭山西人爲北平叅政時防藩府甚嚴未幾遷刑  
部侍郎充北平採訪使甫至境聞變亟走歸聞上  
建文元年設平燕布政司於真定陞昭刑部尚書

掌司事平安諸兵敗召歸京師靖難兵入城出亡  
被執見成祖抗罵不屈去齒截手足罵不絕口至  
斷頸乃已

侯太南和人累官至刑部尚書靖難兵起太督餉山  
東濟寧不守輜船陷沒還京建文四年又出淮安  
總軍餉得便宜行事文皇卽位太至高郵與其隸  
上高茅卯仔同執下錦衣獄是年七月死弟敬祖  
子圮皆論死籍其家幼子京兒永樂九年尚繫錦  
衣獄

毛太不知何許人建文元年代王謙爲左侍郎蹇義  
上元縣志 卷十五 表忠 四  
爲右而統爲尚書太文章政事皆優所與交者並  
中朝俊彥靖難兵起數上封事條方畧張統死太  
亦死或曰卽毛太亨也

卓敬字惟恭瑞安人洪武二十一年進士除戶科給  
事中建文初燕王來朝敬密奏卽徙燕封南昌上  
默然文皇卽位責敬不迎乘輿敬厲聲不遜怒欲  
殺敬敬臨刑從容歎曰變起宗親畧無經畫敬死  
有餘罪矣神色凜然經日如生

盧迴浙江仙居人建文三年爲戶部侍郎迴踈爽不  
屑曲謹然大節皎然少喜飲酒飲酣輒長歌人或

謂迴狂旣仕顧折節恭慎靖難後不屈縛就刑長  
謳而死聞者悲之或曰盧琪

郭任丹徒人或曰定遠人廉慎有吏才仕至戶部侍  
郎調兵食軍興不乏靖難兵入金川門任不屈死  
之子經亦坐死少子金山保戍廣西嘉靖中鎮江  
知府劉儲秀祀之鄉賢祠

黃魁不知何許人建文中爲禮部侍郎與陳廸黃觀  
共事魁行古雅有文學習典禮廸觀皆敬愛之靖  
難初魁不屈死之

陳植廬江人元舉河南鄉試不仕洪武間起爲吏部

上元縣志

卷十五 表忠

五

文選主事歷官兵部侍郎靖難兵至植受命督師  
江上有督將密議降者植責以大義督將恨之遂  
遇害督將率衆奉迎自陳邀賞文皇立誅之具棺  
斂植遣官護喪葬於白石山植宗人大懼皆變姓  
名走匿無敢會葬者

論曰陳景道官雲南右布政及任建文論水旱災  
異以清刑獄恤逃民爲急務深達治體惜遭國變  
父子同日就刑鐵鉉守濟南遏靖難兵不得過壯  
矣侯太暴昭毛太被執不屈死黃瀾伯與方齊並  
見信用募兵上游至安慶聞變謂人曰吾妻翁有



志節必不辱已而信至果然卓惟恭當燕王來朝時請徙封南昌令建文早自斷決何至諸臣焦爛若是盧迥臨刑長歌而死郭任金川門破與子經同死黃魁有文學陳植督師江上被害文皇嘗歎曰國家養士三十年惟得卓敬嗚呼詎獨卓敬一人哉

胡子昭字仲常從方孝孺學建文二年進刑部左侍郎四年死之臨刑詩曰兩間正氣歸泉壤一點丹心在帝鄉年四十一

練子寧名安以字行新淦人洪武十八年進士建文元年除御史大夫靖難兵渡江上書論大計指斥用事者文皇卽位縛子寧至語不遜斷其舌曰吾欲效周公輔成王子寧手探舌血大書地上成王安在遂族其家姻黨逮戍邊者百五十一人

景清本耿姓真寧人洪武二十七年進士建文時擢左都御史文皇繼統方練等死而清獨委蛇侍朝人疑之一日早朝清緋衣入先是星者奏文曲犯帝座甚急文皇因疑清及朝清獨著緋遂收之得所帶劔詰責不屈而死是夕精英迭見遂族其家已而入殿廷爲厲籍其鄉謂之瓜蔓抄

茅大芳大興人洪武中儒士應辟典教淮南高廟召對秦府長史勉以董子輔相之業大芳感激額其堂曰希董建文二年擢右副都御史靖難兵起遺詩淮南守將梅殷四年八月死之

陳性善名復初以字行山陰人洪武十八年進士累官禮部左侍郎皇太孫在東宮時熟聞性善名及卽位退朝獨召性善賜坐問治天下之要且使手書以進靖難兵起改性善爲副都御史監軍四年三月辛巳戰靈璧敗績與彭與明劉伯完王資皆被執文皇縱之歸性善衣朝服躍入河死之彭與

上元縣志

卷十五 表忠

七

明棄官變姓名

王叔英字原采黃巖人洪武二十年薦起家仙居訓導陞漢陽知縣孝孺欲復井田叔英遺書方阻之召爲翰林修撰上資治八策靖難兵至淮叔英奉詔募兵行至廣德聞變會齊太奔至相抱慟哭且圖後舉已而事不可爲沐浴衣冠書絕命詞藏襦間自經於玄妙觀銀杏樹下妻金繫獄死二女投井死祠山道士盛希年收葬

周是修名德以字行江西太和人舉明經爲霍邱訓導入見擢衡府紀善衡王建文弟未之國是修留

京預修纂靖難師渡江宮中自焚是修留書其家  
別友人解縉楊士奇且付後事暮入應天府學自  
經死年四十九

黃鉞字叔揚常熟人建文二年進士三年外艱方孝  
孺附書與蘇府姚善勉以戮力王室善得書與鉞  
慟哭以死自誓靖難兵至江上善受命總五郡兵  
勤王以書招鉞鉞卽白至善所靖難後捕善急善  
麾下許百戶縛善邀賞善死信至鉞登琴川橋西  
向再拜祀善從容整衣冠奮身入水死

魏冕吉安永豐人建文時爲監察御史勁直有才名  
上元縣志

卷十五 表忠 八

靖難兵至有約開門者冕率同僚十八人卽殿前  
毆之幾死會輟朝冕及鄒瑾大呼請速加誅臣等  
義不與此賊同生不聽明日宮中火起或謂冕宜  
急迎附冕毅色厲聲曰使吾改臣節必不爲時所  
用奈何徒自壞也靖難後冕自盡法官請追罪夷  
其族

王度字子中歸善人少肆力學問通經史能文學爲  
鄉里師以明經儒士薦起家爲山東道監察御史  
有風裁疏十餘上多見采行靖難兵起度與齊黃  
等調兵食建文二年監會試時李景隆累敗退保

濟寧以盛庸代之總兵度密陳便宜有東昌之捷  
徵景隆還不誅反用事忌庸并讒度度稍踈斥三  
年夏靖難兵南下益急度請募兵未幾有小河之  
捷勅度勞軍徐州比還鳳陽失守方孝孺與度書  
誓死社稷四年秋七月謫戍賀州坐語不遜夷其  
族卒年四十七

高翔朝邑人有文學矜名節洪武中明經徵爲監察  
御史諸所論奏皆國家機要當上心建文時尤戮  
力戎事相與激發忠義靖難後召翔翔服喪服入  
見大哭語多不遜遂族翔沒其產諸給高氏產者

上元縣志

卷十五

表忠

九

皆加稅曰令世世罵翔也親戚悉戍邊又發其先  
墓雜犬馬骨焚灰揚之而以其地爲漏澤園

顏伯瑋名瓊以字行廬陵人建文元年賢良授沛縣  
知縣靖難兵起三年六月攻沛伯瑋遣縣丞胡先  
至徐告急援兵不至度不能支令其弟珏次子有  
爲還白父子職不克盡矣題詩察院壁指揮王顯  
迎降伯瑋冠帶升堂南拜慟哭曰臣無能報國遂  
自經死時年五十有爲刎於尸側胡先收葬之  
論曰諸君子皆兩間正氣也胡仲常不愧希直練  
子寧死尤慘烈景清上應文曲豈屑爲厲殿廷哉

亦文皇自有懼心耳茅大芳志存希董陳性善進  
治平要策而乃遭時殉國死傷矣王原采之自經  
玄妙觀周是修之自經應天府學黃叔揚之死琴  
川橋下從容暇豫非其卓然見道視死如歸者能  
如是乎魏冕義不與開門賊同生王度陳便宜請  
募兵東昌小河兩捷而以讒被踈斥高翔被召服  
喪服入見語多不遜遭族而禍及先人家何哉顏  
伯瑋守沛不支冠帶南向再拜父子相繼死宜其  
爲守臣致命之秋也

高巍遼州人前軍督府斷事建文卽位上書莫聽冕

上元縣志

卷十五 表忠

十

錯削奪之策當行主父偃推恩之令識出齊黃謀  
國之上靖難兵起請使燕諷文皇不聽南歸遇鐵  
鉉於濟南共誓效忠京城破縊死

劉璟字仲璟父文成太師弱冠涵濡經傳善談兵上  
召見喜曰真伯溫兒矣授谷府長史並勅提調肅  
遼慶寧燕趙六府事璟嘗至燕與文皇奕勝文皇  
曰卿獨不少讓我也靖難兵起璟馳還京獻  
讓不可讓處璟不敢讓也靖難兵起璟馳還京獻  
十六策不聽還家建文遜位璟稱疾不起逮至京  
見上猶稱殿下且云殿下百世後逃不得一箇竄

字詒下獄徽髮自經死得歸葬

甘霖懷寧人洪武丁卯鄉薦為監察御史剛介持正敢言中臺推重之靖難後被執求死從容受戮子孫相戒不復求仕至今微弱正德中知府胡纘宗祀之鄉賢祠

巨敬平涼人初為監察御史伉直敢言建文中為戶部主事清慎有聲靖難後被逮責問不屈死之夷其族

王彬字文質兖州東平人洪武中進士起家為御史巡江淮治揚州靖難兵至彬與指揮崇剛共守揚

上元縣志

卷十五

表忠

十一

城指揮王禮欲舉城降彬與剛知之執禮及其黨繫獄彬外禦內防七日不解甲有力士能舉千斤彬常以自隨靖難兵飛書城中有縛王御史降者官三品左右憚力士莫敢縛彬禮弟宗厚賂力士母誘其子出會彬解甲浴盤中為千戶徐政張勝所縛昇至城上投靖難兵中不屈死之政遂出禮等於獄與江都知縣張本開城門降正德中揚州祀彬名宦

王良字天性祥符人歷官浙江按察使謁岳鄂王墓誓曰苟愧武穆非人也建文遜位大慟九月詔召

良良列薪舉火闔室自焚死

王良字敬止吉水人建文二年進士翰林修撰初聞靖難兵起輒憂不食及渡淮閉門泣涕不已訣妻子服毒死

龔太字叔安義烏人洪武十九年鄉薦建文三年除給事中文皇渡江太與妻訣曰事至此我自分死爾第携幼穉歸否則俱溺井無辱俄宮中火起太投金川門城下死

陳彥圃字士淵莆田人徽州知府靖難兵至江上彥圃糾義勇勤王文皇卽位械至京死之籍其家

上元縣志

卷十五

表忠

三

鄭恕字本忠仙居人治尚書能賦詩善書畫好古博雅家甚貧釜魚餽塵一介不妄取蕭然斗室日與學徒數十人講論經理高風勁節一時敬嚮寧波知府禮聘爲昌國訓導未幾陞蕭知縣留心撫字民愛敬之建文四年靖難支將王聰攻破蕭恕死之年五十六後籍其家二女當醜亦死之子濂浣姪溫汲謫北平種田

王省字子職吉水人洪武五年領鄉薦至京詔免會試命吏部次第擢用省以親老乞歸養尋以文學徵上親試稱旨當殊擢省自陳才薄親老乞便養

... 外艱起復改睢陽凡八年又改濟陽  
... 兵至省為游兵所執從容引譬詞義慷慨眾  
... 省省首歸坐明倫堂伐鼓聚諸生謂曰若等知此  
... 堂何為名明倫今且勿多論只說君臣之義何如  
... 官大與諸生亦哭遂以頭觸柱死女靜適卽墨周  
... 簿聞靖難兵至濟陽謂父必死三遣人訪竟得遺  
... 骸歸葬省子禎為夔州通判亦抗節死賊中

鄭華臨海人字思孝洪武十八年進士初授行人奉  
使川廣有令名建文元年註誤謫東平州吏目靖  
難兵起謂其妻蕭曰吾義必死奈親老妻少何妻

上元縣志

卷十五 表忠

三

泣對曰君能為國妾獨不能為君乎乃稱病尋醫  
携家托友人無錫丞趙次進亟還州州長貳以靖  
難兵且至盡棄城走去華獨率民吏憑城守力不  
支請援山東又不至不食五日而死

盧振靖難兵起與徐輝祖齊黃謀畫攻守効力為多  
靖難兵畏之壬午秋逮至不屈榜振名數其罪殺  
之夷其族

牛景先禦靖難兵數有功金川門失守景先變姓名  
易服出走死蕭寺中已而窮治齊黃黨逮景先妻  
妾發教坊司



儲福無錫新安鄉人也洪武初隸燕山衛籍年二十  
餘頗好義建文末挈母妻逃去文皇卽位詔換購  
戍卒入伍至燕山福在錄中調曲靖衛復挈母妻  
以行因仰天哭曰吾雖一介賤卒義不爲叛逆之  
臣在舟中日夜泣不輟竟不食而死母韓妻范爲  
營地葬之范時年二十有姿色居貧奉姑甚謹每  
哭其夫則走山谷中大號不欲聞之姑也官有聞  
其寡者欲委禽焉旣而聞其事曰此節孝婦也我  
安忍犯之一日范往澗水邊浣衣見其傍草生若  
蘇席草因取之織席售養姑姑賴以存姑年七十

上元縣志

卷十五 表忠

丙

餘終營葬爲廬於墓傍范年八十餘卒席草遂不  
生土人義之卽其廬葺爲菴集尼居之名崇孝菴  
論曰建文才懦而性多忌輔以齊黃之迂濶不曉  
事方汲汲削奪之不暇而魏以主父推恩之說進  
宜其石之投水也劉仲璟意量深遠當其與文皇  
對奕時凜然義形於色矣甘霖巨敬以御史被逮  
王文質守揚不屈敬止聞兵起輒憂不食龔叔安  
與妻訣身後分明王天性不愧武穆自待不薄陳  
士淵糾義勇勤王豈肯欠一死哉鄭本忠知蕭王  
子職教諭睢陽有城守教士之責分固難辭鄭華

盧振牛景先卑官耳視其時之朱紫偷生者直糞壤不若儲福一介賤卒身忠妻孝天固祐之悲夫  
廖鏞巢人祖永忠開國功封德慶侯父權嗣封鏞以適子任散騎舍人歷官至都督建文中與議兵事時宿衛殿庭靖難後上以廖侯兩子鏞與銘嘗受學方孝孺令召之孝孺怒曰汝讀幾年書還不識箇是字兩子復命上怒令軍校收孝孺孝孺杖衰經至闕下大哭上益怒令以刀抉其口兩旁至耳刑之聚寶門外凡七日罵聲不絕廖兩子拾遺骸葬聚寶門外山上甫畢廖氏亦見收兩子遂逃去

上元縣志

卷十五

表忠

五

永樂元年四月錦衣鎮撫司奏獲鏞銘送刑部論死鏞弟鉞及從父淮安指揮僉事俱謫戍邊鏞母東甌王長女也并銘女送浣衣局

盧原質字希魯初名質寧海人父中母方孝孺姑也  
洪武二十一年進士第三人授翰林編修孝孺遺原質詩曰奉天殿上榜初開共賀江南得秀才好與青蘿居士說今年文運屬天台二十三年外艱賜傳奔喪二十八年陞太常少卿事建文君屢有建白靖難後召見不屈死之族其家弟原朴

廖昇襄陽人不知其所以進學行最知名與方孝孺

王紳輩友善洪武中爲左府斷事上知其賢二十九年六月擢太常少卿建文元年正月勅修高皇實錄禮部左侍郎兼翰林學士董倫右侍郎兼翰林學士王景彰爲總裁官昇及翰林侍講學士高巽志副總裁翰林修撰李貫國子博士王紳漢中府學教授胡子昭齊府審理副楊士奇崇仁學訓導羅恢馬龍他郎甸長官司吏日程本立等纂修官昇博雅有史才郎達負氣書靖難兵事語多摭實聞忠誠伯等自龍潭還慟哭與家人訣自縊死都御史陳瑛奏昇黃觀王叔英周是修王良顏伯

上元縣志

卷十五

表忠

六

瑋皆不順天命效死建文計其存心與叛逆等並宜追戮上詔勿問

鄒瑾吉安永豐人洪武三十七年遇金華王紳紳稱瑾志篤才敏議論磊落可喜忠義人也嘗遊成都都人士皆願與瑾交洪武末薦至京建文二年爲大理右寺丞靖難後不屈死之或曰四川江津人洪武中以經明行修薦起縣學教諭遷監察御史歷陞都御史死建文時

胡閏字松友鄱陽人博學修行高皇征陳友諒至鄱陽吳芮祠見壁間題竹幽人無俗懷寫此蒼龍骨

九天風雨來飛騰作靈物高皇問祠中人此誰詩也對曰里墟中儒生胡閏立召閏見置帳前久之官督府經歷建文中以直諒知名遷右補缺尋進大理少卿靖難兵起數與齊黃議軍國事壬午七月不屈死之籍其家子傳道論死傳慶謫戍邊一女得釋歸貧甚無依鄉人競遺錢穀曰此忠臣女也旬日饒足嘉靖初提學副使邵銳祠之學宮

劉端南昌人建文二年進士驟遷大理寺丞廉明執法靖難後與同邑王高並坐縱方孝孺息樹陰劓鼻而終高與端同年進士又與端同官或曰高爲

上元縣志

卷十五

表忠

七

刑部郎中

宋徵不知何許人爲宗人府經歷建文時上疏請削罪廢宗藩屬籍諸王聞之皆恨徵徵又嘗與盧振謝昇牛景先數言耿曹諸將失律懷二心靖難後縛至不屈死并殺其妻子

程本立字原道系出伊川少有大志讀書不務章句洪武九年除秦府引禮舍人三十一年徵入翰林充纂修官建文四年太祖實錄成改江西按察使未至江西聞靖難兵入京自縊死

姚善字克一安陸人洪武中鄉舉累官知蘇州府數

造請郡賢王賓韓奕錢芹俞貞木輩考求治道吏  
民開嚮爲列郡最建文四年督蘇松常鎮嘉五郡  
兵勤王未及戰文皇卽位子澄避善所約共航海  
善謝曰公可去善不可去善爲麾下許千戶等縛  
見文皇詰曰若一郡守乃敢舉兵抗我耶善厲聲  
不遜死之年四十三

曾鳳韶廬陵人洪武末年進士建文初爲監察御史  
會藩王入覲馳皇道入且不拜鳳韶侍班言殿上  
宜展君臣之禮宮中乃敘叔姪之倫由皇道不拜  
大不敬建文君曰至親勿問靖難兵起鳳韶使北

上元縣志

卷十五

表忠

六

平請罷兵歸國不報靖難後召復御史不至尋加  
侍郎召又不至刺血書憤詞襟上曰予生廬陵忠  
節之邦素負剛鯁之強讀書而登進士第仕宦而  
至繡衣郎旣一死之得宜可以含笑於地下而不  
愧吾文天祥屬妻李子公望曰我死勿易衣遂自  
殺時年二十九李亦守節死

龔翊字天章崑山人年十七爲金川門守卒建文末  
靖難兵首入金川門翊大哭後還鄉宣德中周忱  
巡撫兩薦爲崑山太倉學官辭不就曰翊仕無害  
於義恐負往日城門一慟耳竟隱終身門人私謚

爲安節先生

論曰孝孺之禍亟矣廖侯兩子受學盧原質毋孝孺姑廖昇鄒瑾友善語曰不知其人視其友孝孺死諸子皆以不屈死劉端又坐縱孝孺法十族之刑自昔無之胡閏數與齊黃議軍國事齊黃猶之孝孺耳程本立聞變自縊姚善謂子澄可去善不可去守土則然曾鳳韶劾藩王入覲馳御道宋徵請削罪廢諸藩屬籍操之亦蹙龔翊不肯負城門一勦而肯負誰哉

